

Kesedar beri nafas baru kehidupan peneroka

B.H 28-01-08 MS 8

SEJAK lebih 30 tahun penubuhannya, Lembaga Kemajuan Kelantan Selatan (Kesedar) berusaha gigih memajukan kawasan Kelantan Selatan, khususnya di Jajahan Gua Musang dan Jeli.

Daripada kawasan berbukit bukau yang sukar dibangunkan, Kelantan Selatan kini berubah wajah dengan hutan dara diganti ladang kelapa sawit dan getah dengan bandar Gua Musang bakal pesat membangun di tengah-tengahnya.

Buktinya, menerusi Koridor Wilayah Ekonomi Pantai Timur (ECER) yang dilancarkan Perdana Menteri, Datuk Seri Abdullah Ahmad Badawi, Oktober lalu, Gua Musang antara jajahan yang diutamakan dan bakal mendapat limpahan nikmat pembangunannya.


Pengerusi Kesedar, Datuk Ramzi Ab Rahman, berkata antara yang bakal menerima 'rahmat' itu ialah lebih 3,000 peneroka yang masih dibelenggu kemiskinan.

"Menerusi Projek Agropolitan dirancang nanti, mereka (peneroka) akan keluar daripada garis kemiskinan," katanya.

Beliau berkata, Kesedar menjangka ma-

“ Kesedar ditubuh untuk membangun kawasan Kelantan Selatan juga diperuntukkan RM150.7 juta dalam RMK-9 bagi membolehkan agensi itu melaksanakan projek pembangunan infrastruktur, ekonomi, sosial dan pembasmian kemiskinan”

Ramzi Ab Rahman
Pengerusi Kesedar



salah kemiskinan tegar di kawasan Kelantan Selatan itu dapat diatasi sepenuhnya menjelang 2010 dengan rata-rata peneroka memperoleh pendapatan lebih RM1,000 sebulan.

Program agropolitan bermula di Rancangan Kemajuan Tanah (RKT) Renok Baru di Gua Musang dengan penyediaan kawasan penempatan peserta dan akan diikuti pula di RKT Paloh 4.

Ramzi berkata, Kesedar yang ditubuh untuk membangunkan kawasan Kelantan Selatan juga diperuntukkan RM150.7 juta dalam Rancangan Malaysia Kesembilan (RMK-9) bagi membolehkan agensi itu melaksanakan projek pembangunan infrastruktur, ekonomi, sosial dan pembasmian kemiskinan.

Selain itu, Kesedar juga diperuntukkan RM264 juta lagi melaksanakan beberapa lagi projek berimpak tinggi. Menerusi peruntukan sebesar itu Kesedar mampu membawa peneroka ke satu era baru yang mana mereka mampu berdikari.

"Paling penting ialah melahirkan seberapa ramai usahawan tani yang berjaya dan mampu membina empayar perniagaan yang berteraskan pertanian.

“Peluang untuk mereka berjaya sebagai usahawan terbentang luas dengan dana disedia Kesedar dan pihak lain,” katanya.

Beliau turut meminta peneroka memanfaatkan dana melalui Bank Pertanian yang kini membuka peluang seluas-luasnya kepada peneroka untuk menjadi usahawan tani yang berdaya maju.

“Kita gembira apabila Bank Pertanian memberi jaminan membantu peneroka itu dan kita yakin mereka akan memanfaatkan peluang terbuka ini,” katanya.

Pengurus Besar Bank Pertanian, Martini Osman, berkata bank itu membuka peluang seluas-luasnya kepada peneroka untuk mendapatkan dana yang disediakan bank itu.

“Apa yang kita harapkan peneroka itu menceburkan diri dalam projek berdaya maju dan menguntungkan mereka.

“Kami di Bank Pertanian diperuntukkan RM1 bilion melalui RMK-9 dan jika masyarakat tani tidak merebut peluang ini, ia akan menjadi sia-sia,” katanya.

Bagi meningkatkan pendapatan peneroka terbabit dalam kegiatan tanam semula, Kesedar akan menggalakkan peneroka membabitkan diri dalam aktiviti lain yang boleh memberikan hasil lumayan.

Katanya, antara kegiatan boleh diceburi peneroka adalah menternak ayam, memelihara ikan air tawar dan menanam tanaman kontan.

Seorang peneroka di Renok Baru, Radzali Md Husin, 42, berkata kehidupan peneroka kini jauh berubah berbanding dulu.

“Kesedar menjalankan tugas dengan baik bagi membantu kami selama ini,” katanya yang terbabit dalam penanaman kelapa sawit.

Radzali bertekad akan merebut peluang lain untuk menjadi usahawan tani.

“Rugilah jika kami tak rebut peluang ini dan terima kasih kepada Kesedar yang banyak membantu kami golongan peneroka,” katanya. - Bernama